

# JACOBSEN, THOMAS CHARLES ('Tommy Twinkletoes') (1921 - 1973), cerddor, arlunydd a diddanwr

**Enw:** Thomas Charles ('tommy Twinkletoes') Jacobsen

**Dyddiad geni:** 1921

**Dyddiad marw:** 1973

**Rhyw:** Gwryw

**Galwedigaeth:** cerddor, arlunydd a diddanwr

**Maes gweithgaredd:** Perfformio

**Awdur:** Rebecca Eversley-Dawes

Ganwyd Tommy Jacobsen ar 28 Ebrill 1921 yn Stryd y Capel, Pillgwenlli, Casnewydd, Sir Fynwy, yr hynaf o saith o blant Charles Henry Jacobsen (g. 1900), gweithiwr dociau, a'i wraig Nellie (g. Hoskins, 1898). Ganwyd Tommy (fel y gelwid ef gan ei deulu a'i ffrindiau) heb freichiau. Honnai ei fam fod yr anabledd wedi ei achosi pan ddychrynwyd hi gan geffyl yn ystod ei beichiogrwydd (cred gyffredin ar y pryd). Gwelwyd ei allu i ymdopi heb freichiau am y tro cyntaf ac yntau'n faban pan ddefnyddiodd fysedd ei draed i osod dymi yn ei geg.

Dechreuodd ei addysg yn Ysgol Stryd Bolt yng Nghasnewydd, a symudodd wedyn i ysgol ar gyfer plant ag anghenion arbennig ar arfordir de Lloegr (credir mai'r Chailey Heritage Craft School yn Sussex oedd yr ysgol honno). Yn y fan honno y dysgodd Tommy gelfyddyd caligraffeg. Defnyddiodd ei sgiliau caligraffeg i lunio arwyddion ac roedd wrth ei fodd yn arlunio. Byddai ei deulu a'i ffrindiau'n casglu cardbord iddo wneud ei luniau arno a byddai'n gwerthu ei waith.

Cafodd Tommy Jacobsen yrfa hir fel cerddor a diddanwr. Byddai ei deulu'n mwynhau gwranddo arno'n chwarae'r piano (a gyflawnodd trwy wasgu'r nodau gyda bysedd ei draed), a byddent yn cydganu'n aml. Roedd yn boblogaidd fel pianydd yn lleol, gan berfformio mewn tafarnau ac yng nghartrefi pobl. Daeth yn boblogaidd yn ddiweddarach yn sioe amrywiaethol deithiol Palladium Llundain ac yn enwog am ei ystod eang o sgilau a'i waith celf.

Gwnaeth ei ddehurwydd argraff fawr ar bawb oedd yn ei adnabod. Gallai roi edau mewn nodwydd, gwnïo botwm, cynnig sigarét o'i siaced a'i thanio. Wrth iddo ddod yn fwyfwy adnabyddus, cafodd wahoddiadau i weithio i sefydliadau fel y BBC ac ymddangosodd yn gyson ar y teledu, ar gylchoedd y sioeau adloniant a'r tu ôl i'r llenni.

Yn 1955 ymddangosodd yn y Preston Hippodrome yn y sioe 'Miracles of the Music Hall' ac yn 1956 teithiodd yn rhyngwladol gyda Sioe Deithiol Tom Norman, wedi ei hysbysebu fel 'Tommy the armless wonder'. Perfformiodd yn Central Park, Efrog Newydd, gan lwytho gwn a'i danio, eillio dyn a ddewiswyd o'r gynulleidfa, chwarae'r piano ac arddangos ei waith celf.

Priododd Tommy ag Emily Violet Prowse yn 1947 yng Nghasnewydd ac yn 1948 ganwyd eu merch Diane. Wedi iddo ymdeol o'r busnes adloniant symudodd Tommy a'i deulu i Gwm-brân.

Bu Tommy Jacobsen farw ar 3 Hydref 1973 ac fe'i claddwyd ym Mynwent Panteg, Pontypwl.

## Awdur

Rebecca Eversley-Dawes

## Ffynonellau

Gwybodaeth deuluol

Ancestry

Lancashire Evening Post, 10 Mai 1955

Boston Guardian, 2 Mai 1956

[National Fairground and Circus Archive](#), Sheffield University

'[Sister remembers Newport's Tommy "Twinkletoes"](#)', South Wales Argus, 15 Chwefror 2011

'[Bywgraffiad Byr o Tommy 'Twinkletoes' Jacobsen](#)', Casgliad y Werin Cymru

## Dolenni Ychwanegol

Wikidata: [Q125792318](#)

Dyddiad cyhoeddi: 2024-05-30

Hawlfraint Erthygl: <https://creativecommons.org/licenses/by-sa/4.0/> 

Mae'r Bywgraffiadur Cymreig yn cael ei ddarparu gan Lyfrgell Genedlaethol Cymru a Chanolfan Uwchefrydiau Cymreig a Cheltaidd Prifysgol Cymru. Mae ar gael am ddim ac nid yw'n derbyn cymorth grant. Byddai cyfraniad ariannol yn ein helpu i gynnal a gwella'r wefan er mwyn i ni fedru parhau i gydnabod Cymry sydd wedi gwneud cyfraniad nodedig i fywyd yng Nghymru a thu hwnt.

Ewch i'n [tudalen codi arian](#) am ragor o wybodaeth.

